

Aflonyddu rhywiol rhwng cyfoedion ymhlith dysgwyr

Canfyddiadau'r gwaith ymgysylltu

Ebrill 2022

Fel rhan o ymchwiliad y Pwyllgor Plant, Pobl Ifanc ac Addysg i aflonyddu rhywiol rhwng cyfoedion ymhlith dysgwyr, cynigiodd y Tîm Ymgysylltu â Dinasyddion ymgynghoriad i gasglu safbwyntiau plant a phobl ifanc drwy arolwg ar-lein.

1. Ymgysylltiad

1. Cynhaliodd y Tîm Ymgysylltu â Dinasyddion arolwg ar-lein rhwng 18 Mawrth ac 1 Ebrill. Roedd cwestiynau'r arolwg ansoddol yn targedu pobl ifanc 11 i 18 oed ac yn gofyn sut roeddent yn meddwl y gellid mynd i'r afael ag aflonyddu rhywiol rhwng cyfoedion, mewn ysgolion a cholegau a'r tu allan iddynt.
2. Er mwyn llunio'r crynodeb hwn, cynhaliwyd dadansoddiad o set ddata gyflawn; gellir priodoli'r holl ddata i ymatebion unigol a gellir dadansoddi ymhellach ar gais.

Cyfranogwyr

3. Cafwyd hyd i gyfranogwyr drwy alwad i weithredu ar sianeli cyfryngau cymdeithasol a thrwy randdeiliaid y Pwyllgor.
4. Cafodd yr ymgynghoriad 106 o ymatebion gan gyfranogwyr rhwng 12 a 18 oed.
5. Cafwyd ymatebion o 12 o ardaloedd awdurdodau lleol.
6. Cafwyd chwe ymateb gan rai a oedd yn astudio mewn coleg, 95 gan rai mewn ysgolion uwchradd.



7. Hoffai'r Tîm Ymgysylltu â Dinasyddion ddiolch i bawb a gyfrannodd at y rhaglen ymgysylltu.

Methodoleg

8. Roedd ymgynghoriad y Tîm Ymgysylltu â Dinasyddion yn ystyried un o gylchoedd gorchwyl penodol yr ymchwiliad ("Effeithiolrwydd polisiau a chanllawiau cyfredol, a'r camau i nodi atebion a gwelliannau posibl").

9. Roedd hefyd yn sicrhau ffocws ar weledigaeth y Pwyllgor o ran Strategaeth y Chweched Senedd (i "[g]anolbwyntio ar p'un a yw polisi a deddfwriaeth yn cael eu gweithredu: a ydynt yn gwneud gwahaniaeth i fywydau plant a phobl ifanc").

10. Yn olaf, roedd yn grymuso pobl ifanc i awgrymu sut i fynd i'r afael â'r mater hwn o'u safbwynt hwy.

11. Ynghyd â chwestiynau ar oedran, awdurdod lleol a statws astudio, gofynnwyd y pedwar cwestiwn agored a ganlyn i gyfranogwyr:

- I. Dywedwch wrthym sut ry'ch chi'n meddwl y gall y bobl sy'n gwneud penderfyniadau sy'n effeithio ar bobl ifanc fynd i'r afael â'r broblem o aflonyddu rhywiol rhwng cyfoedion mewn amgylchedd dysgu, er enghraifft ysgol neu goleg?
- II. Dywedwch wrthym sut ry'ch chi'n meddwl y gall y bobl sy'n gwneud penderfyniadau sy'n effeithio ar bobl ifanc fynd i'r afael â'r broblem o aflonyddu rhywiol rhwng cyfoedion y tu allan i amgylchedd dysgu, er enghraifft pan fyddwch chi gartref neu'n treulio amser gyda'ch ffrindiau y tu allan i'r ysgol neu'r coleg?
- III. Ydych chi'n meddwl bod unrhyw beth yn rhwystro'ch awgrymiadau? Er enghraifft, a fyddai'n costio arian neu'n cymryd amser i ddigwydd? A oes gennych chi unrhyw syniadau ynghylch sut i oresgyn y rhwystrau hyn?
- IV. A oes gennych chi unrhyw syniadau neu sylwadau eraill ar y pwnc hwn yr hoffech chi eu rhannu gyda'r Pwyllgor?

Mae ymatebion i gwestiwn IV wedi'u cynnwys yn y crynodebau o'r tri chwestiwn cyntaf yn seiliedig ar y themâu perthnasol.

12. Gofynnwyd i gyfranogwyr beidio â rhannu profiadau personol o aflonyddu rhywiol. Yn hytrach, gofynnwyd iddynt ganolbwyntio eu hatebion ar ffyrdd o ddatrys problemau aflonyddu rhywiol rhwng cyfoedion.

2. Canfyddiadau'r gwaith ymgysylltu: datrys y broblem

Isod mae'r themâu sy'n dod i'r amlwg o ddau gwestiwn cyntaf yr ymgynghoriad, ar sut i ddatrys y broblem o aflonyddu rhywiol rhwng cyfoedion, y tu mewn a'r tu allan i amgylchedd dysgu.

Addysgu pobl ifanc

- 13.** Roedd addysg yn thema a gododd dro ar ôl tro yn yr ymatebion, gyda galwadau am fwy o addysg am beth yw aflonyddu rhywiol, beth mae caniatâd yn ei olygu a sut i roi gwybod am ddigwyddiad. Soniodd 41 y cant o'r ymatebwyr am addysgu pobl ifanc yn eu hymatebion.
- 14.** Roedd rhai ymatebion yn sôn am fwy o addysg o fewn amserlen yr ysgol a'r coleg. Awgrymodd eraill y dylid cael partneriaid allanol, megis yr heddlu, i roi sgysiau.

"Addysgu disgyblion ynghylch y canlyniadau a ddaw yn sgil y gweithredoedd hyn. Rhoi gwersi."

"Gwell addysg am beth yw aflonyddu rhywiol, sut i roi gwybod amdano, ac i bwy."

"Addysgu pobl ifanc ar beth yw aflonyddu rhywiol rhwng cyfoedion a nodi nad yw hyn yn ymddygiad derbyniol. Siarad am ganiatâd, dysgu beth yw caniatâd a beth nad yw'n ganiatâd."

"Rydyn ni angen i bobl ifanc gael gwybod am aflonyddu rhywiol, heb iddo gael ei orchuddio â siwgr, dweud y gwir wrthyn nhw sut mae'n effeithio ar bobl, rhoi ystadegau go iawn ar y mater, addysgu am ganiatâd."

- 15.** Roedd addysg hefyd yn thema gref pan holwyd ynghylch mynd i'r afael â'r broblem y tu allan i'r amgylchedd dysgu. Teimlai llawer y byddai addysg mewn ysgol neu goleg hefyd yn trosi i atebion y tu allan i'r amgylcheddau hyn.
- 16.** Yn ogystal ag addysgu am natur aflonyddu rhywiol a chaniatâd, awgrymodd ymatebwyr fwy o ymwybyddiaeth o ganlyniadau aflonyddu ar gyfoedion a'r effaith y gall aflonyddu ei chael.

"Rwy'n meddwl y byddai dechrau o fewn y system addysg yn mynd i'r afael â'r broblem y tu mewn a'r tu allan i amgylchedd dysgu. - efallai... byddai codi ymwybyddiaeth o beth yw aflonyddu rhywiol rhwng cyfoedion o fudd i'r ateb."

"Dysgu pobl ifanc nad yw'n briodol, rhoi dealltwriaeth addysgiadol llawn gwybodaeth iddyn nhw o beth yw aflonyddu rhywiol, sut y gall effeithio ar bobl, beth fydd yn digwydd os bydd yr aflonyddwr yn cael ei ddal."

"Addysg ehangach ar caniatâd hefyd. Mae'n cael ei gyflwyno fel rhywbeth du a gwyn iawn yn yr ysgol, ac felly mae llawer o bobl yn cael eu gadael yn ddryslyd pan fyddant yn mynd i mewn i ardal lwyd. Mae angen i ni ddysgu caniatâd gan fod pobl yn fwy tebygol o'i brofi – ychydig iawn o bobl sy'n cael eu hymosod yn y ffordd dreisgar a ddangosir yn yr ysgol."

"Addysg ar y pwnc, man diogel i siarad, llwybr y gallwch ei ddilyn i geisio gweithredu ymhellach drwy'r ysgol."

Disgyblaeth gliriach

17. Soniodd 16 y cant o'r ymatebwyr am ddisgyblaeth yn eu hymatebion.

18. O fewn y system addysg, teimlai rhai ymatebwyr fod angen mwy o gosb am achosion o aflonyddu rhywiol a gwella'r ffordd y caiff cwynion eu huwchgyfeirio.

"Annog ysgolion i gymryd mwy o gamau yn erbyn aflonyddu. Nid yw rhai ysgolion yn gwneud unrhyw beth, ac mae'r dioddefwyr yn cael eu gorfodi i symud ysgolion neu weithio rhywbeth allan eu hunain."

"Rwy'n credu bod angen i'r bobl sy'n gyfrifol am adroddiadau aflonyddu rhywiol wneud mwy i gosbi'r troseddwr, ac nid dim ond gorfod aros ar ôl yr ysgol ac yna ffonio gartref yw ystyr hyn. Rwy'n cyfeirio at dynnu'r pethau maen nhw'n eu mwynhau a'u breintiau o fewn yr ysgol i ffwrdd, er enghraifft methu â chymryd rhan mewn gweithgareddau allgyrsiol."

"Cosbi cyfoedion sy'n gwneud sylwadau neu weithredoedd aflonyddu rhywiol. Cael teledu cylch cyfyng ym mhob ystafell ac eithrio ystafelloedd ymolchi er mwyn cadw llygad barcud."

"Nid yw aros ar ôl yr ysgol na'u gwahardd o'r ysgol yn gwneud dim oherwydd maen nhw'n dod yn ôl ac yn ei wneud i ferch/unigolyn arall."

19. Y tu allan i'r system addysg, roedd yr awgrymiadau'n cynnwys mwy o fewnbwn gan rieni, yr heddlu a'r awdurdod lleol.

20. Roedd rhai ymatebion hefyd yn awgrymu gwell cyfreithiau yn erbyn aflonyddu ar y cyfryngau cymdeithasol.

"Rheolau llymach yn erbyn aflonyddu rhywiol."

"Rhoi gwybod amdano. Gallai gael ei ystyried yn drosedd ac felly ni ddylai fod yn rhywbeth rydych yn anghofio amdano."

"Y llywodraeth a gwefannau cyfryngau cymdeithasol i sicrhau bod mwy o ddeddfau, gan ei gwneud hi'n fwy anodd i'r pethau hyn ddigwydd."

"Heddlu, rhieni, rhybuddion ac ati. Os ydyn nhw'n ei wneud y tu allan i'r ysgol, yn enwedig i unigolyn arall o'r un ysgol neu os bydd rhywun arall yn ei riportio i'r ysgol dylai gael sancsiwn."

Ei gymryd o ddifrif

- 21.** Roedd 16 y cant o'r ymatebion yn sôn am yr angen i gymryd aflonyddu rhywiol fwy o ddifrif yn eu hysgol neu goleg.
- 22.** Teimlai rhai fod athrawon yn rhy gyflym i esgusodi'r ymddygiad, yn hytrach na gweithredu. Teimlai eraill y dylai fod mwy o ymwybyddiaeth ymhlith athrawon o'r aflonyddu rhywiol sy'n digwydd.

"Athrawon i gymryd aflonyddu rhywiol o ddifrif a rhoi cosb briodol. Athrawon i fod yn fwy ymwybodol wrth nodi aflonyddu a mynd i'r afael ag ef."

"Rwy'n meddwl bod llawer o athrawon a rhai myfyrwyr yn anwybyddu aflonyddu rhywiol. Dydyn nhw ddim yn ei gymryd o ddifrif fel y dylen nhw."

"O fy mhrofiad o athrawon yn enwedig o fewn blynyddoedd cyfun, maen nhw'n dweud mai dim ond 'chwarae o gwmpas' yw sefyllfaoedd fel hyn pan dwi'n teimlo y dylai hyn gael ei gymryd o ddifrif. Fodd bynnag, mewn amgylchedd coleg, rwy'n teimlo bod cyhuddiadau'n cael eu cymryd llawer mwy o ddifrif."

"Pan fyddwch chi'n cael gwybod am neu wedi gweld aflonyddu rhywiol, gwnewch yn siŵr eich bod chi'n gwneud rhywbeth yn ei gylch, peidiwch â'i esgusodi. Cymerwch y peth o ddifrif, fel hiliaeth. Cefnogwch ferched i fynd i'r afael ag aflonyddu a cham-drin yn rhywiol."

"...Rwy'n credu bod angen i oedolion/athrawon fod yn fwy ymwybodol o'r hyn y mae plant/myfyrwyr yn ei wneud a pheidio ag anwybyddu rhai o'r arwyddion y gallai rhywbeth sy'n peri pryder fod yn digwydd."

"Trin y pwnc gyda'r difrifoldeb y mae'n ei haeddu. Yn aml, nid yw athrawon/darlithwyr ac ati yn ymwybodol o aflonyddu rhywiol a gellir dweud yn aml fod aflonyddu rhywiol wedi digwydd oherwydd dadl, er enghraifft, neu 'dynnu coes' – nid yw hyn yn wir ac

nid yw'n mynd i'r afael â gwreiddiau aflonyddu rhywiol; yn syml, rydyn ni'n cicio'r can i lawr y ffordd drwy ddweud hyn..."

Gwasanaethau cymorth

23. Soniodd 16 y cant o'r ymatebion am y cymorth sydd ar gael i ddiodefwyr aflonyddu rhywiol. Awgrymodd llawer fod angen mwy o gymorth a mwy o ymwybyddiaeth o sut i gael gafael ar y cymorth sydd ar gael ar hyn o bryd. Roedd hyn yn berthnasol o fewn yr amgylchedd dysgu a'r tu allan iddo.

"Gwneud yn siŵr eu bod yn gwybod ble i fynd i gael mwy o gyngor fel gwefannau, meddygon, fferyllfa fel eu bod yn gwybod y gallant ei wneud yn gyfrinachol os oes angen."

"Creu lle diogel i ddiodefwyr siarad am eu profiadau, gan gymryd myfyrwyr sy'n cwyno o ddifrif."

"Creu amgylchedd lle mae pobl yn gallu siarad am aflonyddu/ymosodiad heb y pwysau i ddod ymlaen yn ei gylch. Gall llawer o fyfyrwyr deimlo'n ynysig wrth geisio siarad â rhywun gan eu bod yn aml yn meddwl y bydd athro yn eu gwthio i gymryd camau pellach/ysgrifennu datganiadau/mynd at yr heddlu/dweud wrth athrawon eraill ac ati. Mae angen lle ar fyfyrwyr i siarad am yr hyn sydd wedi digwydd heb deimlo'n ofnus o unrhyw un o'r canlyniadau hyn. Mae arnom angen lleoliadau mwy anffurfiol lle mae pobl yn teimlo'n gyfforddus i wneud hyn. Mae unigedd a pheidio â siarad ond yn arwain at ganlyniadau mwy difrifol."

"Ei gwneud yn fwy amlwg bod pobl yn ceisio helpu'r diodefwyr ac nid amddiffyn y troseddwr/aflonyddwr.Helpu'r myfyrwyr i ddod yn ymwybodol o beth yw aflonyddu rhywiol, beth yw eu hawliau ar ôl y ffaith, a pha ganlyniadau y gall a sawl a gafodd ei aflonyddu eu hwynebu, a gall helpu i atal yr aflonyddu yn y lle cyntaf."

"Gwneud i bobl ifanc yn y gymuned gael ymdeimlad o ymddiriedaeth yn yr oedolion sydd i fod i ofalu amdany'n nhw. Efallai y gallai fod yn rhywun sy'n gweithio gyda'r heddlu i riportio unrhyw ddigwyddiadau neu bryderon."

"Neilltuo aelodau penodol o staff, y mae myfyrwyr yn ymddiried ynddynt, i'r rôl. Trefnu bod dyn wedi'i neilltuo ar gyfer y bechgyn a menyw wedi'i neilltuo i'r merched."

Ymwybyddiaeth o ddiogelwch

24. Y tu allan i'r amgylchedd dysgu, siaradodd nifer fach o ymatebwyr am fwy o ymwybyddiaeth o ddiogelwch.

"Gallech chi osgoi lleoedd tawel lle nad oes neb yn mynd a cheisio mynd i leoedd lle mae oedolion yn bresennol."

"TCC mewn mannau poblogaidd ac amhoblogaidd fel parciau a lonydd cefn fel ei bod yn hawdd monitro aflonyddu rhywiol."

"Bod yn ymwybodol o lle ydych chi a gwneud yn siŵr eich bod yn ffrindiau gyda'r bobl iawn."

3. Canfyddiadau'r gwaith ymgysylltu: Rhwystrau

Isod mae'r themâu a ddeilliodd o drydydd cwestiwn yr ymgynghoriad ar rwystrau i'r syniadau a gynigiwyd.

Arian

- 25.** Roedd 14 y cant o'r ymatebwyr yn meddwl y byddai'r awgrymiadau a wnaed ganddynt, megis mwy o hyfforddiant, adnoddau a chymorth, yn costio arian. Ond teimlai'r rhan fwyaf fod angen yr atebion er gwaethaf y rhwystr hwn.

"Wrth gwrs byddai'n costio arian, ond mae'n broblem y mae angen gwario arian arni."

"Efallai y bydd angen hyfforddiant i gefnogi athrawon a allai gostio arian a chymryd amser."

"Y prif rwystrau yw arian, ni all yr ysgol ddarparu popeth ac ni all ariannu na dod o hyd i amser ychwanegol i addysgu myfyrwyr am y peth."

Amser

- 26.** Roedd 18 y cant o'r ymatebwyr yn meddwl y byddai'n cymryd amser i roi'r newidiadau yr oeddent wedi'u hawgrymu ar waith, ond eto, roedd y rhan fwyaf yn teimlo y byddai'n amser gwerthfawr.

"Ie byddai'n cymryd amser ond yn sicr mae'n werth yr amser gan fod addysg ar y pwnc hwn yn bwysig iawn i greu amgylchedd mwy diogel."

"Bydd yn cymryd amser ac o bosibl arian i hyfforddi athrawon ar sut i ymdrin â'r peth ond dwi'n meddwl y dylai fod yn flaenoriaeth o ystyried pwysigrwydd a difrifoldeb."

"Byddai'n cymryd amser, ond byddai'n hawdd goresgyn hynny drwy gymryd amser allan o wers ar ryw adeg neu ei ddysgu yn y dosbarth."

Amharodrwydd i siarad

27. Roedd rhai ymatebion yn sôn ei bod yn anodd i bobl ifanc siarad am eu profiadau.

"Mae angen llawer o ddewrder ac ymdrech ar bobl ifanc, er enghraifft, i drafod eu hiechyd meddwl, ac mae angen cydnabod hyn."

28. Teimlai eraill y gallai fod yn anodd o safbwynt yr oedolyn hefyd.

"Gallai athrawon fod yn anghyfforddus yn siarad am berthnasoedd. Gallai hyfforddiant ddatrys y broblem hon."

Diffyg cymorth gan oedolion

29. Roedd nifer o ymatebion yn sôn am y diffyg cymorth gan oedolion fel rhwystr i unrhyw newid.

"Y prif rwystr yw nad yw wedi bod yn ddigon pwysig, ym meddyliau pobl mewn pŵer. Mae menywod a merched wedi dioddef hyn yn rhy hir."

"Pobl ddim yn gwranddo."


"Amharodrwydd gan athrawon a rhieni yw'r rhwystr mwyaf. Maen nhw'n meddwl bod y ffaith bod rhywun yn fyfyrwr yn golygu y gallan nhw aflonyddu heb wynebu cosb..."

4. Y bwrdd golygyddol

- 30.** Yn ogystal â'r arolwg ar-lein, cysylltodd y Tîm Ymgysylltu â Dinasyddion â nifer o sefydliadau i sefydlu bwrdd golygyddol o blant a phobl ifanc. Diben y bwrdd golygyddol oedd dadansoddi'r data a gafwyd o'r arolwg a thrafod eu dealltwriaeth o'r materion, yr atebion a'r gwelliannau posibl ac yna rhoi adborth i'r Pwyllgor.
- 31.** Cysylltwyd â myfyrwyr Coleg Cambria yng Nglannau Dyfrdwy. Cynhaliodd y Tîm Ymgysylltu â Dinasyddion weithdy gyda'r grŵp o bum myfyriwr Ffilm a'r Cyfryngau, lle buom yn trafod yr ymatebion i'r arolwg a'r atebion posibl i'r broblem o aflonyddu rhywiol ymhlith dysgwyr.
- 32.** Blaenoriaethodd y myfyrwyr y themâu allweddol, gan ddewis y dyfyniadau a oedd yn dangos y rhain orau ac yna trafodwyd y ffordd orau o gyflwyno'r canfyddiadau i'r Pwyllgor.
- 33.** Blaenoriaethwyd y prif negeseuon yn bedwar argymhelliad i'r Pwyllgor eu hystyried:
- Argymhelliad 1:** Credwn fod angen mwy o addysg mewn ysgolion a cholegau ar beth yn union yw aflonyddu rhywiol
- Argymhelliad 2:** Credwn y dylai fod mwy o ganllawiau i athrawon ar sut i fynd i'r afael â chyhuddiadau o aflonyddu rhywiol
- Argymhelliad 3:** Credwn y dylai fod canllawiau cliriach ar ddisgyblaeth i'r rhai sy'n aflonyddu'n rhywiol ar eraill
- Argymhelliad 4:** Credwn y dylai fod mwy o gymorth ar gael i ddiodefwrwr aflonyddu rhywiol
- 34.** Cafodd canfyddiadau'r bwrdd golygyddol eu troi'n fideo, a gaiff ei gyflwyno i'r Pwyllgor.

Atodiad 1

Oedran yr ymatebwyr i'r arolwg



Statws astudio yr ymatebwyr i'r arolwg

